

考工典

考工典第一百二十三卷

園林部紀事

漢書曹參傳始參微時與蕭何善及爲宰相有隙至何且死所推賢唯參參代何爲相國舉事無所變更一遵何之約束擇郡國吏長大訥於文辭謹厚長者卽召爲丞相史吏言文刻深欲務聲名輒斥去之日夜飲酒卿大夫以下吏及賓客見參不事事來者皆欲有言至者參輒飲以醇酒度欲有言復飲酒醉而後去終莫得開說以爲常相舍後園近吏舍吏舍日飲歌呼從吏患之無如何乃請參遊後園聞吏醉歌呼從吏幸相國怒召按之乃反取酒張坐飲大歌呼與相和參見人之有細過掩匿覆蓋之府中無事

董仲舒傳仲舒廣川人也少治春秋孝景時爲博士下帷講誦弟子傳以久次相授業或莫見其面蓋三年不窺園其精如此

西京雜記梁孝王好營宮室苑囿之業作曜華之宮築兔園
漢書梁孝王傳王有罪入朝乘布車從兩騎入匿長公主園

田蚡傳蚡召客飲坐其兄蓋侯北向自坐東向以爲漢相尊不可以兄故私撓由是滋驕治宅第田園極膏腴市買郡縣器物相屬於道

西京雜記茂陵富人袁廣漢藏鏹巨萬家僮八九百人於北邙山下築園東西四里南北五里激流水注其內構石爲山高十餘丈連延數里養白鸚鵡紫鴛鴦鵲牛青兕奇獸怪禽委積其間積沙爲洲嶼激水爲波潮其中致江鷗海鶴孕雛產鰕延漫林池奇樹異草靡不具植屋皆徘徊連屬重閣修廊行之移晷不能徧也廣漢後有罪誅沒入爲官園鳥獸草木皆移植上林苑中

後漢書桓榮傳榮字春卿沛郡龍亢人也少學長安習歐陽尙書事博士九江朱普貧窶無資常客傭以自給精力不倦十五年不窺家園

晉書郭文傳文少愛山水尙嘉遁王導聞其名遣人迎之文不肯就船車荷擔徒行既至導置之西園園中果木成林又有鳥獸麋鹿因以居文焉於是朝士咸共觀之文頽然箕踞傍若無人居導園七年未嘗出入

桓元傳元性貪鄙好奇異尤愛寶物珠玉不離于手人士有法書好畫及佳園宅者悉欲歸己猶難

逼奪之皆蒲博而取遣臣佐四出掘果移竹不遠數千里百姓佳果美竹無復餘遺

謝安傳安於土山營墅樓館林竹甚盛每攜中外子姪往來游集肴饌亦屢費百金世頗以此譏焉而安殊不以屑意

會稽王道子傳道子嬖人趙牙出自優倡茹千秋本錢塘捕賊吏因賂諂進道子以牙爲魏郡太守千秋驃騎諮議參軍牙爲道子開東第築山穿池列樹竹木工用鉅萬道子使宮人爲酒肆沽賣於水側與親昵乘船就之飲宴以爲笑樂帝嘗幸其宅謂道子曰府內有山因得遊矚甚善也然修飾太過非示天下以儉道子無以對唯唯而已左右侍臣莫敢有言帝還宮道子謂牙曰上若知山是板築所作爾必死矣牙曰公在牙何敢死營造彌甚

王獻之傳獻之嘗經吳郡聞顧辟疆有名園先不相識乘平肩輿徑入時辟疆方集賓友而獻之游歷既畢傍若無人辟疆勃然數之曰傲主人非禮也以貴驕士非道也失是二者不足齒之傖耳便驅出門獻之傲如也不以屑意

張天錫傳太和初詔以天錫爲大將軍大都督督隴右關中諸軍事護羌校尉涼州刺史西平公天

錫數宴園池政事頗廢盪難將軍校書祭酒索商上疏極諫天錫答曰吾非好行行有得也觀朝榮則敬才秀之士玩芝蘭則愛德行之臣觀松竹則思貞操之賢臨清流則貴廉潔之行覽蔓草則賤貪穢之吏逢颶風則惡凶狡之徒若引而申之觸類而長之庶無遺漏矣

長安志姚興常於逍遙園引諸沙門聽番僧鳩摩羅什演講佛經起逍遙宮殿庭左右有樓閣高百尺相去四十丈以麻繩大一圍兩頭各掛樓上會日令二人各從繩行過以爲佛神相遇

宋書戴顓傳顓出居吳下吳下士人共爲築室聚石引水植林開澗少時繁密有若自然

孔季恭傳季恭弟靈符會稽太守尋加豫章王子尚撫軍長史靈符家本豐產業甚廣又於永興立墅周回三十三里水陸地二百六十五頃含帶二山又有果園九處爲有司所糾詔原之而靈符答對不實坐以免官

徐湛之傳湛之轉中書令領太子詹事出爲前軍將軍南兖州刺史善於爲政威惠並行廣陵城舊有高樓湛之更加修整南望鍾山城北有陂澤水物豐盛湛之更起風亭月觀吹臺琴室果竹繁茂花藥成行招集文士盡遊玩之適一時之盛也

劉劭傳劭進號平西將軍豫州刺史餘如故不拜其年徵拜散騎常侍中領軍劭以世路糾紛有懷止足求東陽郡上以劭啟徧示朝臣自尙書僕射袁粲以下莫不稱贊咸謂宜許上曰巴陵建平二王並有獨往之志若世道寧晏皆當申其所請劭經始鍾嶺之南以爲棲息聚石蓄水彷彿丘中朝士愛素者多往游之

梁書何點傳點與會稽孔稚珪爲莫逆友從弟遁以東籬門園居之稚珪爲築室焉園內有卞忠貞塚點植花卉塚側每飲必舉酒酹之

南史茹法亮傳法亮吳興武康人也齊武帝卽位爲中書通事舍人除員外郎帶南濟陰太守與會稽呂文度臨海呂文顯並以奸佞諂事武帝勢傾天下廣開宅宇杉齋光麗與延昌殿相埒延昌殿武帝中齋也宅後爲魚池釣臺土山樓館長廊將一里竹林花藥之美公家苑囿所不能及

南齊書劉悛傳悛遷侍中車駕數幸悛宅宅盛治山池造甕牖世祖著鹿皮冠被悛菟皮裘於牖中宴樂以冠賜悛至夜乃去

南史齊竟陵王子良傳子良武帝第二子也上晚年好游宴尙書曹事亦分送太子省視太子與竟

陵王子良性奢麗宮內殿堂皆雕飾精綺過于上宮開拓元圃園與臺城北塹等其中起出土山池閣樓觀塔宇窮巧極麗費以千萬多聚異石妙極山水慮上宮中望見乃旁列修竹外施高鄣造游觀數百間施諸每飲必舉酒酌之

劉慧斐傳慧斐字文宣彭城人也少博學能屬文起家安成王法曹行參軍嘗還都途經尋陽遊於匡山過處士張孝秀相得甚歡遂有終焉之志因不仕居于東林寺又于山北構園一所號曰離垢園時人乃謂爲離垢先生

伽藍記敬義里南有招德里內有尙書僕射游擊御史尉李彪七兵尙書崔林幽州刺史常景司農張倫等五宅彪景出自儒生居室儉素唯倫最爲豪侈齋宇光麗服玩精奇車馬出入逾於邦君園林山池之美諸王莫及倫造景陽山有若自然其中重巖複嶺嶽峯相屬深谿洞壑遷逶連接高林巨樹足使日月蔽虧懸葛垂蘿能令風烟出入崎嶇石路似壅而通崢嶸澗道盤紆復直是以山情野興之士遊以忘歸天水人姜質志性疎誕麻衣葛巾有逸民之操見偏愛之如不能已遂造亭山賦行傳於世 法雲寺北有侍中尙書臨淮王彧宅彧博通典籍辨慧清悟風儀詳審容止可

觀至三元肇慶萬國齊臻貂蟬耀首寶玉鳴腰負荷執笏逶迤複道觀者忘疲莫不歎服或性愛山林又重賓客至於春風扇柳花樹如錦晨食南館夜遊後園僚案成羣俊民滿席絲桐發響羽觴流行詩賦並陳清言乍起莫不領其元奧忘其褊悵焉是以入或室者謂登仙也荊州秀才張裴裳常爲五言有清拔之句云異林花共色別樹鳥同聲或以蛟龍錦賜之亦有得緋紬緋綾者唯河東裴子明爲詩不工罰酒一石子明八斗而醉眠時人譬之山濤

自退酤以西張方溝水東南臨洛水北達芒山其間東西二里南北十五里並名爲壽丘里皇宗所立也民間號爲王子坊當時四海晏清八羌率職珠囊紀慶玉燭調辰百姓殷阜年登俗樂鰥寡不聞犬豕之食糲獨不見牛羊之衣於是帝族王侯外戚公主擅山海之富居川林之饒爭修園宅互相誇競崇門豐室洞戶連房飛館生風重樓起霧高臺芳樹家家而築花林曲池園圍而有桃李夏綠竹柏冬青而河間王琛最爲豪首常與高陽爭行造文柏堂形如徽音殿琛常語人云石崇乃是庶姓猶能雉頭狐腋畫節雕薪況我大魏天王不爲華侈造迎風館於後園窗戶之上綺錢青瑣玉鳳銜鈴金龍吐珮素柰朱李枝條入簷伎女樓上坐而摘食經河陰之役諸元殲盡王侯第宅多題爲寺壽丘里間列剎相望祇洹鬱

起寶塔高臨四月八日京師士女多至河間寺觀其殿廡綺麗無不歎息以爲蓬萊仙室亦不足過入其後園見溝瀆潏洄石磴嶢嶢朱荷出池綠萍浮水飛梁跨樹層樓出雲咸皆嘖嘖雖梁王兔苑想之不如也

北齊書世宗本紀世宗諱澄字子惠神武長子元象元年攝吏部尙書銓擢得人才名之士咸被薦擢假有未居顯位者皆致之門下以爲賓客每山園遊燕必見招攜執射賦詩各盡其所長以爲娛適

河南王孝瑜傳初文襄于鄴東起山池遊觀時俗眩之孝瑜遂於第作水堂龍舟植幡稍於舟上數集諸弟宴射爲樂武成幸其第見而悅之故盛興後園之玩於是貴賤慕敦處處營造

鄭述祖傳述祖所在好爲山池松竹交植盛饌以待賓客將迎不倦

酉陽雜俎歷城房家園齊博陵君豹之山池其中雜樹森竦泉石崇邃歷中祓禊之勝也曾有人折其桐枝者公曰曰何爲傷吾鳳條自後人不復敢折公語參軍尹孝逸曰昔季倫金谷山泉何必踰此孝逸對曰曾詣洛西遊其故所彼此相方誠如明教孝逸常欲還鄴詞人餞宿於此逸爲詩曰風

淪歷城水月倚華山樹時人以此兩句比謝靈運池塘十字焉

周書高賓傳賓渤海裔人也世宗初除咸陽郡守政存簡惠甚得民和世宗聞其能賜田園于郡境賓既歸旅歸國親屬在齊常慮見疑無以取信乃於所賜田內多蒔竹木盛構堂宇并鑿池沼以環之有終焉之志朝廷以此知無貳焉

唐書韋嗣立傳嗣立與韋后屬疏帝特詔附屬籍顧待甚渥營別第驪山鸚鵡谷帝臨幸命從官賦詩制序冠篇賜况優備因封嗣立逍遙公名所居曰清虛原幽棲谷嗣立獻木栢藤盤數十物

曹王皐傳皐遷荆南節度使張柬之有園圃在襄陽皐嘗宴集將市取之馬彛曰漢陽有中興功今遺業當百世共保奈何使其子孫鬻乎皐謝曰主吏失詞以爲君羞微君安得聞此言

舊唐書路嗣恭傳恭子恕私第有佳林園朝之名卿咸從之遊高歌縱酒不屑外慮

雲仙雜記揚州太守園中有杏花數十畝每至爛開張大宴一株令一娼倚其旁立館曰爭春開元中宴罷夜闌人或云花有歎聲

唐書王維傳維別墅在輞川地奇勝有華子岡欽湖竹里館柳浪茱萸泝辛夷塢興裴迪游其中賦

古今圖書集成
詩相酬爲樂

蕭復傳復字履初生戚里嫺從豪汰以服御輿馬相夸復常衣垢敝居一室學自力非名士夙儒不與遊以清操顯推主蔭爲宮門郎廣德中歲大饑家百口不自振議鬻昭應墅宰相王縉欲得之使弟紘說曰以君才宜在左右胡不以墅奉丞相取右職復曰鬻先人墅以濟孀單吾何用美官使門內餒且寒乎縉憾之由是廢數歲

楊綰傳綰始輔政御史中丞崔寬本豪侈城南別墅池觀堂皇爲當時第一卽日遣人毀之

裴度傳時閹豎擅威天子擁虛器縉紳道喪度不復有經濟意乃治第東都集賢里沼石林叢岑繚幽勝午橋作別墅具燠館涼臺號綠野堂激波其下度野服蕭散與白居易劉禹錫爲文章把酒窮晝夜相歡不問人間事

杜佑傳佑拜光祿大夫守太保致仕朱坡樊川頗治亭觀林塋鑿山股泉與賓客置酒爲樂

劇談錄平泉莊去洛城三十里卉木臺榭若造仙府有虛檻前引泉水縈迴穿鑿像巴峽洞庭十二峰九派迄於海門皆隱隱見雲霞龍鳳草木之形有巨魚肋骨一條長二丈五尺其上刻云會昌六

年海州送到在東南隅卽徵士韋楚老拾遺別墅楚老風韻高致雅好山水相國居廊廟日以白衣
擢昇諫署後歸平泉造門訪之楚老避於山谷相國題詩云昔日徵黃詔余慙在鳳池今來招隱士
恨不見瓊枝

秦中歲時記進士杏花園初會謂之探花宴以少俊二人爲探花使徧遊名園若他人先折得名花
則二使皆有罰

畫墁錄唐京省入伏假三日一開印公卿近郭皆有園池以至樊杜數十里間泉石占勝布滿川陸
至今基地尙在省寺皆有山池曲江各置船舫以擬歲時遊賞諸司唯司農寺山池爲最

湖湘故事湖南馬氏作會春園開宴徐東野作詩有數聯爲當時所稱云珠璣影冷偏粘草蘭麝香
濃却損花山色遠堆螺黛雨草梢春蔓麝香風衰蘭寂寞含愁綠小杏妖嬈弄色紅

宋史趙上交傳周顯德二年上交拜吏部侍郎多請告不朝時出遊別墅世宗因問陶穀曰上交豈
衰老乎穀對曰上交首掌貢舉放鬻市家子李觀及第受所獻名園多植花卉優游自適世宗怒免
其官

李建中傳建中歷金部員外郎建中性簡靜風神雅秀恬於榮利前後三求掌西京留司御史臺尤愛洛中風土就構園池號曰靜居好吟詠每遊山水多留題自稱巖夫民伯

避暑錄話李公武私第爲閒燕會賢二堂一時名公卿皆從之游其東得隙地百餘畝悉疏爲池力求異石名木參列左右號靜淵莊俗言李家東莊宣和間木皆合抱都城所無其家以歸有司改爲擷芳園

試筆張齊賢形體魁肥飲食兼數人然其爲相嘗有邊功國朝宰相惟宋琪與齊賢知邊事然其常與王濟不相能濟剛峭之士也其後齊賢罷相歸洛陽買得午橋裴晉公綠野堂營爲別墅一日濟自洛至京師公卿間有問及齊賢午橋別墅者濟忿然曰昔爲綠野堂今作屠兒墓園矣聞者皆笑聞見前錄洛城之南東午橋距長夏門五里蔡君謨爲記蓋自唐以來爲游觀之地裴晉公綠野莊今爲文定張公別墅白樂天白蓮莊今爲少師任公別墅池臺故基猶在二莊雖隔城高槐古柳高下相連接午橋西南二十里分洛堰司洛水正南十八里龍門堰引伊水以大石爲杠互受二水洛水一支自後載門入城分諸園復合一渠繇天門街北天津引龍一橋之南東至羅門伊水一支正

北入城又一支東南入城皆北行分諸園復合一渠由長夏門以東以北至羅門皆入於漕河所以洛中公卿庶士園宅多有水竹花木之勝元豐初開清汴禁伊洛水入城諸園爲廢花木皆枯死故都形勢遂減四年文潞公留守以漕河故道湮塞復引伊洛水入城入漕河至偃師與伊洛匯以通漕運隸白波輦運司詔可之自是由洛舟行河至京師公私便之洛城園圃復盛公作亭河上榜曰漕河新亭元祐間公還政歸第以几杖罇俎臨是亭士女從公遊洛焉

石林詩話賈文元曲水園在許昌城北有大竹三十餘畝潁河貫其中以入西湖最爲佳處初爲本州民所有文潞公爲守買得之潞公自許移鎮北門而文元爲代一日挈家往游題詩壁間云畫船載酒及芳辰丞相園林潁水濱虎節麟符拋不得却將清景付閒人遂走使持詩寄北門潞公得之大喜卽以地券歸賈氏文元亦不辭而受然文元居京師後亦不復再至園今荒廢竹亦殘毀過半矣

墨客揮犀張宗永華州人倜儻不羈善爲詩寶元中以職官知建安縣時鄴州陳相尹京兆宗永嘗以事失公意公有別業在鄴杜縣間宗永知公好絕句詩乘閒詣之於舍壁大書二韻云喬松翠竹

絕織埃門對南山盡日開應是主人貪報國功名遂不歸來莊督錄以聞公覽而善之待之如初宗永嘗有詩云大書文字隄防老剩買峯巒准備閒嘉句甚多往往膾炙人口

元城語錄溫公營獨樂園園丁呂直性愚公以直名之春時人遊園丁得茶湯錢十千園丁日與主人分之一日來納公公曰此汝錢可持去再三欲留公怒遂持之顧曰只端明不愛錢者後十許日公見園中新創一井亭問之乃前不受十千所創也

過庭錄溫公獨樂園林賦詩述美者甚衆李夷行有見山臺詩云闕上句紛紛紅紫簇虛簷山光不肯饒春色故向花間出數尖蓋臺側盡栽花卉也

避暑錄話司馬溫公作獨樂園朝夕燕息其間已而游嵩山疊石溪而樂之復買地於旁以爲別館然每至不過數日復歸不能常有故其詩有暫來還似客歸去不成家之句

東軒筆錄慶曆中西師未解晏元獻公殊爲樞密使會大雪歐陽文忠公與陸學士經同往候之遂置酒於西園歐陽公卽席賦晏太尉西園賀雪歌其斷章曰主人與國共休戚不唯喜悅將豐登須憐鐵甲冷徹骨四十餘萬屯邊兵晏深不平之嘗語人曰昔日韓愈亦能作言語每赴裴度會但云

園林窮勝事鐘鼓樂清時却不曾如此作閒

宋史盧秉傳秉字仲甫未冠有雋譽嘗謁蔣堂坐池亭堂曰亭沼粗適恨林木未就爾秉曰亭沼如爵位時來或有之林木非培植根株弗成大似士大夫立名節也堂賞味其言曰吾子必爲佳器
妮古錄晁無咎閑居濟州金鄉葺東臯歸去來園樓觀堂亭位置極瀟灑盡用陶語名之自畫爲大圖書記其上

石林詩話姑蘇南園錢氏廣陵王之舊園也老木皆合抱流水奇石參錯其間最爲工王翰林元之爲長洲縣宰時無日不攜客醉飲常有詩曰他年我若功成後乞取南園作醉鄉今園中大堂遂以醉鄉名之大觀末蔡魯公罷相欲東還詔以園賜公公卽戲以詩示親黨云八年帷幄竟何爲更賜南園寵退師堪笑當時王學士功名未有便吟詩

清波雜志蔡京罷政賜鄰地以爲西園毀民屋數百間一日京在園中顧焦德曰東園與西園景致如何德曰太師公相東園嘉木西園如雨可謂東園如雲西園如雨也語闢抵罪

老學庵筆記陶淵明遊斜川詩自敘辛丑歲年五十蘇叔黨宣和辛丑亦年五十蓋與淵明同甲子

也是歲得園於許昌西湖上故名之曰小斜川云

墨莊漫錄崔鷗德符潁昌陽翟人宣和中監西京洛南稻田務時中宦客佐掌宮鑰于洛郡寮事之惟恐不及惟德符不肯見之容極銜之德符一日送客于會節園時梅花已殘與客飲梅下已而容奏陳以會節園爲景華御苑德符初不知也明年暮春復騎瘠馬從老兵入園中梅下哦詩曰去年白玉花結子深林間小憩藉清影低髻啄微酸故人不復見春色今已闌繞樹尋履跡空餘土花斑徘徊而去次日容見地有馬跡問園吏吏以崔對容怒其輕已遂劾奏鷗徑入御苑以此罪廢累年却掃編趙嘏字德進宋城人先公初秉政薦爲勅令所刪定官方改京秩晚節益不喜仕築室南都城北杜門不交人事有園數畝雜植花木日居其間鄉人目之爲獨樂園然晚復再娶年頗相懸劉待制器之戲曰豈謂獨樂園中乃有少室山人乎

宋史宦者陳源傳源有園名小隱其制視禁籞有加高宗以賜王才人

齊東野語文穆范公成大晚歲卜築于吳江盤門外十里蓋因闔閭所築越來溪故城之基隨地勢高下而爲亭榭所植多名花而梅尤多別築農圃堂對楞伽山臨石湖蓋太湖之一派范蠡所從入